

Mis Läbe, verzelt i fuf Minute

I heisse Arnold Furrer, ha zwöi tolli Chind und vier wirbligi Änel.

Vo Bruef Bouingenieur, Architekt, und en Abetüerer. Bi mit em Schiff über en Atlantik nach Kolumbie gfahre ... i bi mer vorcho wie der Kolumbus, won i ha chönne säge: Land in Sicht ... der Südamerikanisch Kontinänt!

Nach eim Jahr bin i zrüggocho, ha in Holland ghürate und mit der Frou usgwanderet, wider nach Kolumbie. Nach drü Jahr schaffe für e lokali Firma isch du üsi Tochter Maya in Cali gebore, u mir si id Schwyz cho für meh Sicherheit.

Näch 15 Jahr schaffe i der Schwyz si d'Chind gross gsi, denn hani chönne für die humanitäre Hilf sporadisch Isätz mache: 1 Jahr in Bolivie und Kolumbie, und im Ganze 13 Jahr i 5 Länder in Afrika. I ha Brügge, Wasserversorgige, Schuele, Gsundheitspöschte flüchtlingslager und vieles meh planet und usgfürt. I de Ferie bin i über Land und Wasser, 30'000 km mit öffentlechem Vercher, chrüz und quer dür ganz Afrika vagabundiert da han i mini Abetüerluscht gründlech chönne uslabe!

Plötzlech Blitz us heiterem Himu Hirnschag! 16 Tag im Inselspital, meischtens bewusstlos ... halb glähmt ... halb blind ... i ha d'Schprach verlohre!

Und denn, i der REHA-Klinik in Tschugg, e wunderbari Uferstehig, langsam aber sicher. Die 6 Schprache won i vorhär fliessend gredt ha, mit em Bärndütsch sis 7 ... im Chopf intakt, aber z'Mundwärch funktioniert überhoubt nüm. I ha alles müesse nöi lerne artikuliere, jede Buechstabe vom Alfabeth, Mundbilder ablase und imitiere wie nes Chlychind, jede Tag schtundelang üebe. Nach fasch drü Monet in Tschugg bin i wider heicho uf Oschtermundige ... ohni körperlechi Behinderige. Bi gücklech, spaziere jede Tag im Wald, mache mängisch e Chlättertour, mache mi Hushalt sälber. I hüete mehrmals pro Wuche miner Änel, das isch immer e bsunderi Fröid.

Vo chlii uf han i gärn gsunge und i vilne Chör mitgmacht. Bi de AphaSingers singen i sit meh als 4 Jahr, es isch mini zwöiti Familie worde. Nach däm ig so wunderbar wieder uferstande bi, wott i jede Tag singen u jutze!

I säge: es isch wider e nöie Tag, e gschänkte Tag!

Danke!